

Convenio de colaboración entre a Consellería de Cultura, Educación, Formación Profesional e Universidades da Xunta de Galicia e o Colexio Profesional de Enxeñaría en Informática de Galicia para a realización de charlas de concienciación do programa “Navega con rumbo”

En Santiago de Compostela.

REUNIDOS

Dunha parte, Don **ROMÁN RODRÍGUEZ GONZÁLEZ**, conselleiro de Cultura, Educación, Formación Profesional e Universidades, que actúa en virtude das facultades atribuídas no artigo 34 da Lei 1/1983, do 22 de febreiro, reguladora da Xunta e da súa Presidencia, de acordo co seu nomeamento polo Decreto 60/2022 do 15 de maio, polo que se nomean os titulares das vicepresidencias e consellerías da Xunta de Galicia, e do establecido no Decreto 119/2022, do 23 de xuño, polo que se establece a estrutura orgánica da Consellería de Cultura, Educación, Formación Profesional e Universidades (en diante Consellería).

Da outra, Don **FERNANDO SUÁREZ LORENZO**, con NIF 32654057Z, presidente do Colexio Profesional de Enxeñaría en Informática de Galicia (en diante, o Colexio), en nome e representación desta entidade, con sede na rúa Fernando III O Santo, nº 13, 1º A, 15701 Santiago de Compostela (A Coruña), en virtude das atribucións que lle confiren os estatutos do Colexio, aprobados polo Decreto 100/2016, do 7 de xullo, da Xunta de Galicia (DOG do 9 de agosto), así como pola Lei 10/2006, do 1 de decembro, do Parlamento de Galicia, de creación do Colexio Profesional de Enxeñaría en Informática de Galicia.



As dúas partes teñen plena capacidade legal para levar adiante este convenio de colaboración e

EXPOÑEN

1. Que a Consellería é o departamento da Xunta de Galicia ao que lle corresponden as competencias e funcións en materia de planificación, regulación e administración do ensino regrado en toda a súa extensión, niveis, graos, modalidades e especialidades, tal e como establece o Decreto 119/2022, do 23 de xuño, polo que se establece a estrutura orgánica da Consellería de Cultura, Educación, Formación Profesional e Universidades.

2. Que a Consellería ten encomendadas competencias para contribuír ao desenvolvemento da sociedade da información nos centros educativos públicos. Así mesmo, é responsable da política de fomento e coordinación para a creación de programas destinados a facilitarles aos centros docentes públicos os recursos necesarios para o desenvolvemento adecuado de contornas virtuais de dentro dunha estratexia de educación dixital, con accións de formación e difusión cara á comunidade educativa.

3. Que a Lei orgánica 3/2020, do 29 de decembro, pola que se modifica a Lei orgánica 2/2006, do 3 de maio, de educación, insiste, no seu preámbulo, na necesidade de ter en conta o cambio dixital que se está producindo nas nosas sociedades e que forzosamente afecta á actividade educativa. O desenvolvemento da competencia dixital non supón soamente o dominio dos diferentes dispositivos e aplicacións. O mundo dixital é un novo hábitat no que a infancia e a mocidade viven cada vez máis: nel aprenden, relaciónanse, consomen, gozan do seu tempo libre. Co obxectivo de que o sistema educativo adopte o lugar que lle corresponde no cambio dixital, inclúese a atención ao desenvolvemento da competencia dixital dos e das estudantes de todas as etapas educativas, tanto a través de contidos específicos como nunha perspectiva transversal, e facendo fincapé na fenda dixital de xénero.

4. Que a Lei 4/2011, do 30 de xuño, de convivencia e participación da comunidade educativa, aborda por primeira vez no plano legislativo o tratamento de situacións de acoso, partindo da definición destas situacións de acordo cos criterios xeralmente admitidos pola comunidade pedagóxica, e inclúe a



problemática derivada do mal ou inadecuado uso das novas tecnoloxías. Neste sentido o programa "Navega con rumbo" está aliñado na promoción do uso responsable das novas tecnoloxías.

5. Que o Colexio ten entre os seus fins e funcións a regulación do exercicio, promoción e mellora das actividades profesionais que engloban as enxeñarías en informática e o fomento e promoción de actuacións relacionadas con este sector profesional, entre as que se atopan a implantación da sociedade de información e das tecnoloxías da información en todos os ámbitos da actividade económica e social da Comunidade Autónoma de Galicia, entre os que se inclúe o ámbito educativo.

6. Que ambas as dúas partes comparten o interese en mellorar e maximizar o uso dos recursos educativos dixitais a disposición do sistema educativo galego no marco da Estratexia de Educación Dixital 2030, de xeito que non só se melloren as oportunidades e competencias do alumnado e profesorado, senón que se desenvolva nunha contorna de uso e navegación en Internet responsable e útil, que propicie a seguridade mediante a información e a prevención.

"Navega con rumbo" está encamiñado, por unha banda ao alumnado para guialos cara unha navegación segura, tratando de evitar que sexan vítimas de condutas como o ciberacoso ou outros riscos da rede, e por outra, para o profesorado e familias, facéndoos partícipes das recomendacións que eles poden aprender de xeito que tamén sexan transmisores para o alumnado.

En consecuencia, as dúas partes acordan subscribir este convenio conforme as seguintes

CLÁUSULAS

Primeira. *Obxecto do convenio*

O convenio ten por obxecto establecer as condicións da colaboración entre a Consellería e o Colexio para o desenvolvemento do programa "Navega co rumbo" para a participación dos centros educativos sostidos con fondos públicos dependentes da Consellería de Cultura, Educación, Formación Profesional e Universidades no curso 2022/2023.



Segunda. *Desenvolvemento da colaboración*

1. O Colexio levará a cabo as seguintes actuacións:

- a) A realización de charlas de concienciación están destinadas a comunidade educativa (alumnado, profesorado e familias) de 5º e 6º curso de educación primaria, 1º curso de educación secundaria obrigatoria e 1º curso de ciclos de formación profesional de grao básico dos centros seleccionados dependentes da Consellería. Nelas empregarase a lingua galega, tanto nas comunicacións orais como nas presentacións e recursos empregados, e levarase a cabo en horario que permita a máxima difusión entre a comunidade educativa.

Cada unha das charlas do programa “Navega con rumbo” terán unha duración dunha hora e realizaranse un total de 240 xornadas.

No programa, as xornadas serán coordinadas e xestionadas polo Colexio coa supervisión e aprobación da Dirección Xeral de Ordenación e Innovación Educativa. O Colexio realizará enquisas de satisfacción entre os participantes que lle reportarán á Consellería unha análise dos resultados coas súas conclusións.

- b) O Colexio obrígase a levar a cabo, directamente ou en colaboración con outras entidades, as actuacións establecidas neste convenio, e debe proceder, en consecuencia, á asignación dos medios humanos e materiais que sexan necesarios.
- c) O Colexio remitirá á Consellería unha planificación detallada no prazo de 15 días a partir da sinatura deste convenio. Así mesmo, informará mensualmente á Consellería do estado de execución das accións e facilitará a inspección e control dos órganos da Dirección Xeral de Ordenación e Innovación Educativa co obxecto de supervisar o cumprimento das actividades previstas neste convenio.
- d) O Colexio desenvolverá unha nova web asociada ao proxecto na que se porá a disposición información de interese para a comunidade educativa a que está dirixida este programa ou outras persoas con intereses compatibles.



- e) Nas accións de publicidade e comunicación, así como no material de soporte xerado en relación co programa obxecto deste convenio, deberá figurar expresamente a mención á Consellería coa imaxe corporativa correspondente. O material de soporte poderá ser utilizado, logo da aprobación das partes, para a formación do profesorado en xeral.
- f) O Colexio elaborará unha Guía de Boas Prácticas en Internet (para alumnado, profesorado e familias), que estará dispoñibles en soporte dixital na web asociada ao proxecto e que se distribuirán, en formato impreso, naqueles centros que determine a Consellería no número que se acorde, en función dos recursos dispoñibles.

2. A Consellería levará a cabo as seguintes actuacións:

- a) Colaboración e coordinación co Colexio no desenvolvemento das xornadas divulgativas.
- b) A Consellería promoverá na formación permanente do profesorado que desenvolve por medio das estruturas de formación e nas distintas modalidades formativas, a colaboración do Colexio nas accións relativas ao uso responsable da rede Internet, evitando o ciberacoso e outros perigos da rede.

Terceira. Financiamento

Este convenio non leva consigo aparelladas obrigas económicas para ningunha das partes.

Cuarta. Relacións laborais

A subscrición deste convenio non implica relación laboral contractual ou de calquera outro tipo entre o persoal do Colexio Profesional de Enxeñaría en Informática de Galicia e a Xunta de Galicia, de tal modo que non se lle poderá esixir ningunha responsabilidade, nin directa, nin indirecta, nin subsidiaria, polos actos ou feitos ocorridos durante a execución das actuacións e/ou a vixencia deste convenio.



Quinta. Comisión de seguimento

1. Para a coordinación e desenvolvemento deste convenio constituirase unha comisión mixta, formada por catro persoas. Cada unha das partes designará dúas, correspondendo a presidencia e a secretaría da comisión ás persoas representantes da Consellería.

2. A comisión reunirse, con carácter ordinario, unha vez cada curso escolar. A reunión terá lugar logo da convocatoria realizada pola presidencia da comisión, e sempre que unha das partes o solicite.

3. Correspóndenlle á comisión mixta as seguintes atribucións:

- a) Velar polo adecuado desenvolvemento do convenio e resolver calquera dúbida que se xere respecto del, sen prexuízo do establecido na lexislación correspondente.
- b) Analizar o funcionamento desta colaboración e realizar, de ser o caso, propostas de mellora.
- c) Elaborar unha ficha de seguimento anual do convenio sobre o funcionamento do mesmo.
- d) Difundir e promover o convenio asinado entre ambas as partes.

A actuación da Comisión de Seguimento axustarase ao establecido nos preceptos básicos da Lei 40/2015, do 1 de outubro, de Réxime Xurídico do Sector Público, e na Lei 16/2010, de 17 decembro, de organización e funcionamento da Administración xeral e do sector público autonómico de Galicia.

Sexta. Natureza e réxime xurídico

Este convenio ten natureza administrativa, e queda fóra do ámbito da Lei 9/2017, do 8 de novembro, de Contratos do Sector Público pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, que os exclúe expresamente no artigo 6.



Segundo o artigo 4 da Lei 9/2017, do 8 de novembro, de contratos do sector público, as relacións xurídicas, os negocios e os contratos citados nesta sección quedan excluídos do ámbito desta lei, e rexeranse polas súas normas especiais, aplicándose os principios desta Lei para resolver as dúbidas e lagoas que se puidesen presentar.

Así pois, as dúbidas que puidesen xurdir en relación coa interpretación das cláusulas deste convenio, serán resoltas pola comisión mixta. En caso de discrepancias, a súa interpretación, cumprimento e execución corresponderá aos tribunais contencioso-administrativos, tralo esgotamento da vía administrativa.

Sétima. *Protección de datos e confidencialidade*

Ambas as partes comprométese a cumprir as obrigas que se derivan da normativa en protección de datos que se desprende da Lei orgánica 3/2018, do 5 de decembro, de Protección de Datos Personais e garantía dos dereitos dixitais, ditada para adaptar a lexislación española ao Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de dos seus datos persoais e á libre circulación destes datos e polo que se deroga a Directiva 95/46/CE (Regulamento xeral de protección de datos).

Os datos persoais das persoas físicas asinantes do Convenio serán tratados polas partes asinantes unicamente para a adecuada formalización e desenvolvemento deste e en base ao disposto no artigo 6.1 b) do RXPD.

Oitava. *Transparencia*

As partes asinantes deberán cumprir coas obrigas derivadas da entrada en vigor da Lei 1/2016, do 18 de xaneiro, de transparencia e bo goberno. Para tal fin, as partes aceptan que o texto do convenio se publique no Portal de Transparencia e Goberno Aberto da Xunta de Galicia, incluíndo os datos de identificación das persoas asinantes.



Novena. Resolución

Serán causas de resolución deste convenio:

- O incumprimento do seu obxecto.
- O incumprimento total ou parcial de calquera das cláusulas que nel se establecen.
- O acordo unánime de todos/as os/as asinantes.
- A decisión xudicial declarativa da nulidade do convenio.

Décima. Vixencia

Este convenio entrará en vigor o día da súa sinatura, e durará ata finais do curso académico 2022/23, isto é o día 31 de agosto de 2023, podendo ser prorrogado expresamente por cursos académicos sucesivos, salvo denuncia expresa dunha das partes asinantes e cunha notificación á outra de dous meses de antelación. O seu contido poderá ser modificado, por mutuo acordo das partes, mediante a subscripción do oportuno acordo de modificación.

De conformidade co establecido no artigo 49 da Lei 40/2015, do 1 de outubro, de Réxime Xurídico do Sector Público, a vixencia máxima das prórrogas do convenio non poderán superar o límite temporal establecido.

Décimo primeira. Notificación electrónica

Segundo o artigo 14.2 da Lei 39/2015, do 1 de outubro, do Procedemento Administrativo Común das Administracións Públicas, os colectivos que están obrigados a relacionarse a través de medios electrónicos coas administracións públicas, e polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que estea obrigado a relacionarse electronicamente coa Administración e os empregados das administracións públicas para os trámites que realicen con elas por razón da súa condición de empregado público.



As notificacións realizaranse só por medios electrónicos a través do Sistema de Notificación Electrónica de Galicia Notifica.gal (<https://notifica.xunta.gal>). Para poder acceder a unha notificación electrónica, o interesado deberá contar cun certificado electrónico asociado ao NIF que figure como destinatario da notificación (persoa física ou xurídica). Así mesmo, o interesado pode autorizar a calquera outra persoa a acceder ao contido das súas notificacións.

Lido o Convenio asínase dixitalmente polas partes.

POLA CONSELLERÍA DE CULTURA,
EDUCACIÓN, FORMACIÓN
PROFESIONAL E UNIVERSIDADES

POLO COLEXIO PROFESIONAL DE
ENXEÑARÍA EN INFORMÁTICA DE
GALICIA

O CONSELLEIRO,

O PRESIDENTE,

Román Rodríguez González

Fernando Suárez Lorenzo

